

歸有光全集

2

新刊全補通鑑標題摘要(二)

歸有光全集

②

新刊全補通鑑標題摘要(二)

图书在版编目(CIP)数据

归有光全集 / (明)归有光撰;严佐之,谭帆,彭
国忠主编. —上海:上海人民出版社,2015
ISBN 978-7-208-13353-2

I. ①归… II. ①归… ②严… ③谭… ④彭… III.
①中国文学—古典文学—作品综合集—明代 IV.
①I214.82

中国版本图书馆 CIP 数据核字(2015)第 244886 号

策 劃 王 清 陳 益

責任編輯 黃玉婷 張鈺翰
封面設計 傅惟本

歸有光全集

(全十冊)

[明] 歸有光 撰

嚴佐之 譚 帆 彭國忠 主編

世紀出版集團

上海人民出版社出版

(200001 上海福建中路 193 號 www.ewen.co)

世紀出版集團發行中心發行

浙江新華數碼印務有限公司印刷

開本 890×1240 1/32 印張 168.25 插頁 50 字數 3,803,000

2015 年 12 月第 1 版 2015 年 12 月第 1 次印刷

ISBN 978-7-208-13353-2/K·2447

定價 960.00 圓

本冊目錄

新刊全補通鑑標題摘要(二)

.....

六二三

新刊全補通鑑標題摘要(二)

趙厚均 校點

卷十一

東漢紀

孝和皇帝諱肇，章帝太子也，在位十七年，壽二十七。○時宦官、外戚迭爲消長，漢家之禍自此始矣。

己丑永元元年，竇憲懼都鄉侯暢分官省之權，遣客刺殺之。會北匈奴饑亂，太后以憲爲車騎將軍，使與耿秉擊之，以贖罪。憲、秉與單于戰于稽落山，是山在燕然山南，匈奴中之山也。大破之，出塞三千里，登燕然山，是山在稽落山之北。命中護軍班固刻石勒功，勒功銘曰：「鑠王師兮征荒裔，勦凶虐兮截海外，復其邈兮亘地界，封神兵兮建隆碣，熙帝載兮振萬世。」紀漢威德而還。

【論策題意便覽】

- 燕然刻石勒功 見要贖罪之師不足以爲功立論。

尹遂昌曰：「竇憲以凶儉之資，行盜賊之計，戕殺列侯於屯衛之中，蓋即致于重辟以正王誅，乃聽其擊虜自免，烏有假天討之威，驅無辜之民置之鋒鏑之下，以爲罪人逃死之地哉？竇憲固不可勝誅，然主於內以成其惡者，太后尸之也。」

壬辰四年，竇氏父子兄弟充滿朝廷，是時，憲兄弟專權，帝以朝臣上下莫不附憲，獨中常侍鄭衆，謹敏有心機，遂與衆定議誅憲。帝以太后故，不欲名誅憲，迫令自殺。

胡致堂曰：「竇氏根據已生，逆謀人主，誠有意除之，未易舉手。和帝年纔十四，乃能選用秘臣，密求故事，勒兵收捕，中外肅清，足以繼孝昭之烈矣。所可恨者，當時袁安、任隗居三公之位，帝不與之謀，而乃與鄭衆議之。竇氏雖除，而寺人之權從茲盛矣。諺有之曰：『前門拒虎，後戶進狼。』此之謂也。」

【論策題意便覽】

● 知帝足繼孝昭之烈 要見帝雖有孝昭之明，而大臣無霍光之權，此所以外戚雖誅而閹宦復進也。

班固以竇氏賓客收捕，死獄中。固嘗著《漢書》尚未就，詔固女弟曹壽妻昭踵而成之。壽妻，名昭，所謂曹大家者也。

【論策題意便覽】

- 問班固、司馬遷作史得失何如？

華嶠論曰：「固之序事，不激詭，不抑抗，瞻而不穢，詳而有體，使讀之者亹亹而不厭，信哉其能成名也！固譏司馬遷是非頗謬於聖人，然其論議，常排死節，否正直，而不叙殺身成仁之美，則輕仁義，賤守節甚矣！」

【論策題意便覽】

- 班固《漢書》
- 班固不叙殺身成仁之美 如以「薰消膏消」而譏龔勝之類是也。

胡致堂曰：「班固史筆，自馬遷而後，莫與抗者。其見古人行事得失成敗之迹不爲不博，人物聖愚賢不肖之分不爲不詳。若外戚禍敗之釁，則又疊疊皆前日事。固乃爲寶憲賓客以致殺身，可謂短於識而長於文，輕於德而急於進。自古文人才士，鮮不以此敗者。是故君子寧爲質而野，不爲華而史也。」

【論策題意便覽】

- 班固短於識而長於文 以先器識而後文藝立論。
- 君子寧直而野 泛論後繳班固事。

以宦者鄭衆爲大長秋。帝策勳班賞，衆每辭多受少，帝賢之，常與之議論政事，宦官用權自此始矣。

【論策題意便覽】

- 以鄭衆爲大長秋
- 鄭衆辭多受少
- 宦者用權自此始

丁酉九年，皇太后竇氏崩。追尊母梁貴人爲皇太后，封梁竦三子爲侯，梁氏自此盛矣。

胡致堂曰：「梁氏之禍，諸竇致力於外，太后譖間於內，其怨均也。帝既誅憲等，而奉事太后，不聞虧禮，借曰勉強，及太后崩，乃抑却三公之奏，不遵光武之失，且曰禮臣子無貶尊上之文，恩義兩得，可謂賢矣。」

【論策題意便覽】

●和帝不遵光武之失 光武黜吕后，和帝不敢廢竇后，重在臣子無貶尊上之禮立論。

劉愷稱父命讓爵與弟憲。上從之，徵愷爲郎，弟襲居巢侯爵。

【論策題意便覽】

●以劉愷爲郎

壬寅十四年，班超久在絕域，年老思土，上書乞歸曰：「臣不敢望酒泉郡，但願生入玉門關。在陝西都指揮使司。」乃徵超還，以戊己校尉任尚代爲都護。○超謂尚曰：「塞外吏士，本非孝子順孫，皆以罪過徙補邊屯；而蠻夷懷鳥獸之心，難養易敗。今君性嚴急，水清無大魚，察政不得下和，宜蕩佚簡易，寬小過，總大綱而已。」超去後，尚謂所親曰：「我以班君當有奇策，今所言，平平耳。」尚竟失邊和。○班超還京師。超起自書生，投筆有封侯萬里之志，有相者曰：「超燕頤虎頭，飛而食肉，萬里侯相也。」○立貴人鄧氏爲皇后，后於郡國貢獻，悉令禁絕，歲時但供紙筆而已。帝每欲官爵鄧氏，后輒哀請謙讓，故兄隲終帝世不過中郎將。

【論策題意便覽】

- 願生入玉門關
- 吏士非孝子順孫
- 水清無大魚
- 班君所言平平
- 投筆封侯
- 萬里侯相
- 歲時但供紙筆
- 終世不過中郎將

乙巳元興元年十二月，帝崩。少子隆，生始百餘日，即皇帝位。太后臨朝。

唐仲友曰：「自和帝以後，漢統數絕，皆是諸侯王入繼，又不得明君，所以愈亂。然所以不得賢君者，正緣權不在大臣，外戚宦官利於立昏故也。」

胡致堂曰：「孝和幼冲即位，年十有四，而能誅鋤竇憲，自是大柄在手，威權不失。後十六七年間，亦無太過舉，尊信儒術，友愛兄弟，優禮賢者，克納嘉言，四夷希侵，中國綏靖。方之章帝，實乃過之。而作史者未能鋪張揚厲，曠闕多矣。」

孝殤皇帝諱隆，和帝少子也。在位一年，壽一歲。

丙午延光元年八月，帝崩。太后迎清河王慶慶，章帝第三子。子祐爲孝和皇帝嗣，即皇帝位，太后猶臨朝。○尚書郎樊準以儒風寢衰，上疏曰：「人君不可以不學。光武受命中興，不遑啓處，然猶投戈講藝，息馬論道。孝明庶政萬幾，無不簡心而垂情古典，游意經藝，化洽中國，流及蠻荒。每稱盛時，咸言永平。今學者益少，遠方尤甚，博士倚席不講，謂不施講坐也。儒者競論浮麗，忘謇謇之忠，習譏諛之辭。譏音踐，諂言也。臣愚以爲宜下明詔，博求幽隱，寵進儒雅，以俟聖上講習之期。」太后深納其言。

【論策題意便覽】

●人君不可以不學 先依斷立論，末斷準以講習爲言，未必同於聖人之學意。

孝安皇帝諱祐，清河孝王慶之子。殤帝崩，無嗣，鄧太后立之。在位十九年。○即位數年，太后臨朝。亲政之後，爲寵益盛。

丁未永初元年，太尉徐防以災異、寇賊策免。三公以災異免，自防始。仲長統《昌言》曰：「光武皇帝愠數世之失權，忿強臣之竊命，矯枉過直，政不任下，雖置三公，事歸臺閣。自此以來，三公之職，備員而已。至於中世，權移外戚，寵被近習，水旱爲災，戚宦所致，反以策讓三公，

讓，責也。至於死免，豈不冤哉？」

【論策題意便覽】

- 災異策免三公 要見變理陰陽固三公之職，而漢不任以政，則責有所委矣。
- 仲長統昌言 重在不任其權而又重其責，非古人隆重輔弼之意立論。

庚戌四年，鄧騭在位，頗能推進賢士。弘農楊震，孤貧好學，通達博覽，諸儒爲之語曰：「關西孔子楊伯起。」震之字也。「騭聞而辟之，累遷荊州刺史、東萊太守。當之郡，道經昌邑，故所舉荊州茂材王密爲昌邑令，夜懷金十斤以遺震。震曰：「故人知君，君不知故人，何也？」密曰：「暮夜無知者。」震曰：「天知，地知，我知，子知，何謂無知者！」密愧而出。震性公廉，子孫常蔬食、步行，故舊或欲令爲開產業，震不肯，曰：「使後世稱爲清白吏子孫，以此遺之，不亦厚乎！」○鄧騭會公卿議，欲棄涼州，曰：「譬如衣敗壞，一以相補，猶有所完，不補將兩無所保。」公卿皆以爲然。虞詡言於太尉張禹曰：「若大將軍策，不可者三：先帝開拓土宇，勞而後定，今憚小費，舉而棄之，一也。涼州既棄，即以三輔爲塞，園陵單弱，二也。烈士武臣，多出涼州，今割地而棄之，民庶安土重遷，必引領而怨，曰：『中國棄我于夷狄！』卒然起謀，則園陵舊京非復漢有，三也。」禹然之。○朝歌賊甯季等數千人攻殺長吏，屯聚連年，州郡不能禁。鄧騭以前議惡虞詡，

以詡爲朝歌長，故舊皆弔之，詡笑曰：「事不避難，臣之職也。不遇盤根錯節，無以別利器，此乃吾立功之秋也！」及到官，設三科以募求壯士，自掾吏以下各舉所知，其攻劫者爲上，傷人偷盜者次之，不事家業者爲下，收得百餘人。悉貰其罪，使入賊中誘令劫掠，乃伏兵以待之，遂殺賊數百人。又潛遣貧人能縫者傭作賊衣，以采線縫其裾，有出市里者，吏輒禽之。賊由是駭散，咸稱神明，縣境皆平。

【論策題意便覽】

- 關西孔子 要見震雖篤好，豈可以仿佛孔子？重在諸儒過情之譽立論。
- 君不知故人
- 暮夜無知者
- 震畏四知 嘉其得不愧屋漏之學，末略貶其不宜應隲之辟意。
- 清白吏子孫 嘉其貽謀之遠，能遺人之所不能遺立論。
- 衣補尤有所完
- 大將軍不可者三 問虞詡論涼州不可輕棄者三，其說何如？
- 虞詡爲朝歌長
- 盤根錯節別利器 重在見危授命而不辭其難立論。
- 此吾立功之秋

● 設三科以募壯士 以使功不如使過立論，見其能通於法之外，而卒不害於法也。

● 采線縫裾

胡致堂曰：「虞詡三科所募，以常理論之，皆王法所當治者。取一時之用，平難平之賊，譬猶以蠻夷攻蠻夷也。又使此三科之人因立功得以自新，一舉而數利焉。鄧隲能薦李都、楊震矣，乃以異同之議失之於詡。憎而知其善，果不易耶！」

【論策題意便覽】

● 三科王法所當治 與設三科題同意。

● 一舉數利

乙卯元初二年，太后聞虞詡有將帥之略，以爲武都漢郡名。太守。羌衆數千遮詡於陳倉嶠谷，岐州陳倉縣是，嶠谷今陝州陝縣東、西嶠是。詡即停車不進，而宣言上書請兵，須到當發。羌聞之，乃分鈔傍縣。詡因其兵散，日夜進道，令吏士各作兩竈，日增倍之，羌不敢逼。或問曰：「孫臏減竈而君增之，兵法日行不過三十里，而今日且二百里，何也？」詡曰：「虜衆多，吾兵少，徐行則易爲所及，速進則彼所不測。虜見吾竈日增，必謂郡兵來迎，衆多行速，必憚追我。孫臏見弱，

吾今示強，勢有不可同也。」○杜根嘗上書，欲太后還政。太后大怒，盛以縑囊，撲殺之，載出城外，得蘇逃竄，爲宜城山中酒家保。積十五年，尚書陳忠薦之，帝拜侍御史。○勇，班超子也，請復置都護，屯兵通西域，以拒北匈奴。其後匈奴數與車師入寇河西，大被其害。

【論策題意便覽】

● 宣言上書請兵

● 虞詡增竈

● 減竈增竈 要見兵無常法，當因其勢而利道之立論。

● 見弱示強 與上題同意。

● 杜根爲宜城酒家保

● 班勇有父風

壬戌延光元年，皇太后鄧氏崩，帝始親政事。以閭皇后兄弟并兼卿校典禁兵，於是內寵始盛。中常侍江京等扇動內外，競爲侈虐。○尚書陳忠以詔書既開諫爭，慮言事者必多激切，致不能容，乃上疏豫廣帝意曰：「臣聞仁君廣山藪之大，納切直之謀，忠臣盡蹇諤之節，不畏逆耳之害。今明詔引咎克躬，諮訪群吏，必承風響應，爭爲切直，且優遊寬容，以示聖朝無諱之美。」從之。○汝南薛包，少有至行，父娶後妻憎包，分出之。不得已，廬于外，旦入洒掃。及父母亡，